

東
華
續
錄

東華續錄

咸豐九十二

臣王先謙敬編

臣陶澐宣恭校

夏四月乙丑朔諭內閣曾望顏奏克復名山縣城攻奪金雞關要隘並雅州解圍嘉定擊賊獲勝一摺雲南逆匪藍大順等竄四川名山縣城並分黨據守金雞關分撲雅州府城我兵將百丈場一帶之賊擊退後隨卽分道由新店子白土坎酒岡子等處踏平賊壘偏攻名山縣城經提督占泰等飭參將馬旭林及守備唐友耕等各軍復由後山子進攻文昌宮奎閣山梁之賊將賊營寨盡行平毀馬旭林等軍攻至東南兩門城內賊營火起官軍乘勢登城踰牆湧進將名山縣城克復占泰一面派飭都司柏昌懷等軍分路圍攻金雞關壘經痛勦復探明路徑奮力進攻逆眾分股來拒

唐友耕率領敢死兵勇一擁而上馬旭林等復在關之左右山頂
開放大礮斃匪多名當將金雞關奪獲並連踏關前後賊營七座
逆匪棄營而逃占泰揮兵穿關追剿直至姚橋等處土地坎繞出
賊援亦經擊走馬旭林等兵勇取道平羌渡及姚橋進擊適署重
慶鎮總兵傅崑勦辦車林餘賊事竣率領官兵進剿水津關及大
興場之賊時雅州城內文武與賊堅持疊加剿創已解城圍聞各
軍援至復由東西北三門出擊該匪四路狂奔其嘉定之賊經甘
肅提督郭相忠等分撥官兵進擒牛華谿等賊巢行抵銀窩寺地
方賊出抗拒郭相忠之子縣丞郭定疆墜馬被賊戳傷其孫郭廷
選將賊立斃大隊繼至痛加剿殺將四方壩等賊營焚毀淨盡計
殺賊千餘名似此節節進剿克城奪隘所辦尙爲得手務卽乘此
聲威力圖進取○諭軍機大臣等前因金陵大營官軍不支退守

鍾江當諭令曾國藩等傳旨令都興阿馳赴江北將如何進取之處悉心籌酌茲據瑞昌王有齡奏上游悍賊麇集金陵鎖常處處喫緊請飭曾國藩會同楊載福分剿蕪湖並入甯境以分賊勢等語金陵大營退守鎮江逆賊分踞句容溧水等處圖犯蘇常江浙安危在於呼吸曾國藩見紮安慶若與楊載福率領所部水陸各軍迅由東流建德一帶分剿蕪湖並入甯境以分賊勢而顧蘇常於東南大局實有裨益惟安慶賊勢頗眾曾國藩能否舍安慶而東下著酌度情形相機辦理如兵力不敷未能前進卽飭楊載福統領水師進攻蕪湖扼賊之吭並與李德麟等校巡亦足以牽制賊勢是爲至要有人奏左宗棠熟悉形勢運籌決策所向克敵惟秉性剛直嫉惡如仇以致謠詠沸騰官文亦惑於浮言未免有指摘瑕疵之處左宗棠熟悉湖南形勢戰勝攻取調度有方目下賊

氛甚熾應否令左宗棠仍在湖南本地襄辦團練等事抑或調赴該侍郎軍營並著曾國藩酌量辦理將此由六百里諭令知之○丙寅諭軍機大臣等據庚長等奏西捻復出見籌分路防剿一摺既據探有由浦東竄之說自應早爲準備力遏凶鋒庚長見在募勇集團派員分路堵禦著卽照所議妥辦江甯藩司王夢齡見已派署漕運總督著與庚長會同調度毋令該逆東竄以保完善之區將此由六百里各諭令知之○諭據庚長等奏西捻意圖東竄一摺據稱西路藍黑二旗賊首劉添幅等裝旗復出前竄東豫之賊亦已回巢又有騎馬賊數百人至豐縣蕭縣交界之青里集陳家官莊等處滋擾聲言復由清江東竄雖經庚長募勇集團但兵力過單止可防守近處儻有大股捻匪東竄恐難抵禦著袁甲三傳振邦酌撥勁旅前往援應毋令清淮再有失誤以保下河完善

之區將此由六百里各諭令知之○諭庚辰奏清江西北沿河一帶挑壕築圩以資防守一摺清江爲南北咽喉之地四通八達向無城郭防守最關緊要茲據奏稱數年來蔣壩三河節次保全惟恃湖河水勢設法收蓄是以隔岸堵擊賊難飛渡惟南北順清河上下春冬之際水勢枯落前此捻逆猝至致被闖入亟應趕緊籌備以爲善後之計其清江西路由楊家莊至張福口引河北路由邳州窯灣以下至楊莊地方均就河湖隄岸加築切斗又桃源縣西門南成子河起至眾興以北挑溝築壘以憑守禦等語文俊見抵清江著卽按摺中所稱確切查明是否實在情形辦理有無草率據實具奏將此由五百里諭令知之○先是禮部奏遵議河南巡撫瑛棨奏明儒曹端從祀 文廟得旨大學士軍機大臣另行妥議具奏並酌定以後從祀章程不可漫無限制若定例原有專

條卽不必酌定章程遵例行不準援案至是奏稱曹端篤信好學
守道不移崇正闢邪以力行爲主論者推爲明初理學之冠應如
該部所議準以明儒曹端從祀 文廟東廡其位在先儒胡居仁
之上至從祀章程例無明條應以闡明聖學傳授道統爲斷嗣後
除著書立說羽翼經傳眞能實踐躬行者准奏請從祀 文廟外
其餘忠義激烈者入祀昭忠祠言行端方者入祀鄉賢祠以道事
君澤及庶民入祀名宦祠概不得濫請從祀 文廟其名儒賢輔
已經配享 歷代帝王廟者亦應飭無庸再請從祀從之○命景
運門圓明園八旗步軍統領內外火器營健銳營配齊前備官兵
軍械馬匹聽候飭調迅赴天津防所○丁卯 上還宮○諭內閣
翁同書奏收撫張家岡賊圩並攻破任家圩賊巢分別撫剿一摺
捻逆回竄老巢經副將黃鳴鐸遊擊武全等排築長壕圍攻張家

岡圩該圩民畏懼乞撫其擒首潘四卽潘樹見本係良民亟思自拔來歸卒眾至劉伶口攻破大華家圩殺賊首梁景等旋與伊父潘凱詣苗沛霖處乞降薙髮投誠歸農復業其高家寨寨董任太立等前亦身陷賊中密投練總升用同知高錫齡寨內其議殺賊糾良民爲內應三月二十二日高錫齡等帶練將任家寨攻破擒斬著名擒匪李水秦九等百餘名將被脅良民盡行救出並將賊圩房屋悉行焚毀至閏三月初三日又率練攻破鄧家賊圩殺斃擒首鄧莪等數十名所有出力人員準其酌量保奏○己巳諭內閣袁甲三奏進攻定遠大捷見飭滾營進逼一摺袁甲三派撥馬步各軍進攻定遠直抵城下斃賊甚多逆眾倉皇失措滕家勝等催隊趕到乘其慌亂越壕扒牆槍礮齊發將東北角賊營同時燬平東門突出悍賊二千餘都司黃國安帶廣勇極力抵禦善慶薩

薩布等復分攻西路賊營悉行焚毀統計踏毀賊營九座斃賊一千餘名生擒二百餘名奪獲槍礮多件該大臣當卽督飭諸軍滾營前進直逼城根剿辦尙爲得手著卽乘此聲威迅拔堅城毋再延緩○諭軍機大臣等據袁甲三奏各路探報有九洑洲全軍撤退等語據稱前次該逆糾眾本有欲爭滁全進攻九洑洲爲救援金陵之計經袁甲三派馬步援軍擊退見在江南大營退紮則九洑洲自難固守但江北竟無一軍扼守恐賊蹤北竄在在堪虞著和春等迅卽設法防範仍須統籌大局毋令皖軍爲賊焚攻以固北路藩籬將此由六百里諭令知之○袁甲三奏擒首張落刑在古城與龔逆不睦思欲投誠得旨該擒首罪大惡極恐未必遽敢投誠莫若令其自相疑貳藉除巨慝著傳諭李世忠妥爲辦理如果真心悔罪無實在功績亦難准其投誠○浙江巡撫王有齡奏

請截留未運漕米撫恤難民接濟兵食得旨數處被賊卽通省無
一完地外省習氣一何深也若果澤逮吾民尙能副朕之望此不
過爲屬員冒銷地步上無益而下有損徒飽若輩之囊橐言念及
此殊堪浩歎汝新任封疆好爲之○庚午常雩祀 天於 圜丘

幸圓明園○癸酉何桂清奏自建平東壩溧陽相繼失守蘇常

已岌岌可危不意句容復陷賊遂由溧化鎮直趨金陵至閏三月
十五日全軍皆潰賊勢遂更猖獗兵勇亦不用命二十九日和春
許乃釗皆退守常州驚聞丹陽已失於是江甯藩司薛煥具稟皆
以常州足資堵禦蘇州十分空虛請駐紮蘇州以繫民望商之和
春許乃釗皆以蘇省實屬可慮查兩江總督自金陵失守以後卽
以蘇州爲駐紮之地其以常州爲行館者但爲金陵大營後路糧
臺所在平日不過數百兵勇有警皆係大營調兵至和春等旣到

常州所調官軍皆來自大營則軍務應歸督辦而蘇州則毫無準備文武大小均不知實在軍情大局已形決裂臣擬赴蘇州會同徐有壬等督率兵勇聯結鄉團力籌防剿以固根本 上諭軍機大臣等本日據何桂清奏丹陽失守和春許乃釗退至常州張國樑不知下落並見在布置大概情形一摺前據何桂清奏稱和春等進扼丹陽居中調度方期激勵軍心力圖進取今丹陽又爲賊匪攻陷兵勢屢挫東南大局岌岌可虞和春身爲統帥所司何事致令潰敗至此殊堪痛恨惟當安速布置先固軍心再籌進剿以期力贖前愆蘇郡係省垣重地兵力甚單何桂清自應馳赴該處督率兵勇聯絡鄉團力籌防剿事宜以固根本見在潰勇難民紛往蘇郡奸細最易溷迹何桂清務當與徐有壬督飭地方文武嚴密稽查先清內奸鎮江一帶見有何員駐守張國樑見在曾否回

魯著和春等迅速查明馳奏以慰朕懷本日復據喬松年奏九洲兵勇潰退並李若珠斗患痺證不能行步各等語著和春等仍遵前旨速派得力大員前往更代力顧江北其九洲潰敗兵勇亦卽由江南大營派員迎提催令速赴鎮常毋任逗遛將此由六百里加緊各諭令知之○諭前因金陵大營被陷官軍退守鎮江當諭令都興阿督帶馬步各隊或由舒桐或由霍六進兵與袁甲三等各軍聯絡聲勢駐紮江北進攻六合江浦天長等處本日據喬松年奏丹陽被賊圍攻已於上月二十九日失陷江南北軍情同時喫緊李若珠斗患痺證勢難臨陣督隊等語見在丹陽已失天長六合之賊時時出巢窺伺江北無重兵駐紮該逆難保不乘此鴟張更思竄擾著都興阿卽督帶馬步各隊四五千名趕緊前進與袁甲三等各軍互相聯絡力圖進取並著官文等仍遵前旨

將所需口糧軍火寬爲籌備毋稍延誤曾國藩見在圍攻安慶著
卽迅圖克復遵照前旨率師東下迅掃賊氛其楊載福水師仍著
進攻蕪湖扼賊之吭並與李德麟等梭巡江面以牽賊勢毋令北
竄將此由六百里各諭令知之○諭聯英庚長奏逆匪直撲三河
衡陽圖竄清淮見在撥兵防堵一摺據稱黃黑等旗捻匪直撲衡
陽紮筏搶渡經總兵鶴齡等督隊擊退又另股捻匪竄偏花園黃
都管塘各壩盤踞其竄入三河尾及觀音寺等處之馬賊復經總
兵安勇督飭防堵見在抽撥兵勇赴防嚴密堵禦等語清淮甫經
蹂躪元氣未復此次搶渡之賊雖迭經擊退而衡陽蔣壩兵力究
單儻續有大股東趨誠恐不敷抵禦據生擒賊匪供稱係龔瞎子
部下由古城前來搶擄欲攻打三河與定遠之賊運糧自保定遠
踞匪被圍緊急分黨竄擾意圖牽我官軍並爲賊匪接濟著袁甲

三等挑選精銳派委得力員弁管帶馳赴衡陽三河一帶會同安
勇鶴齡等實力攻剿迅將此股掃除既可爲定遠賊匪絕其外援
亦可兼顧清淮免令天長逆匪乘機北竄將此由六百里諭令知
之○僧格林沁等奏覆相機布置並俄人得有回信兵船並未開
駛情形得旨往返護送不過在京饒舌路途煩擾若永泊闌江沙
內將來必形費手○乙亥諭內閣惇親王奕誼第六子著命名載
洊第七子著命名載滸○諭張芾奏官軍三路會攻克復涇縣一
摺徽甯官軍自克復旌德太平以後經張芾督令進攻涇縣總兵
江長貴督同參將文芳等次於三溪周天受飭令副將吳再升等
進紮琴溪與副將陳大富等一軍聲勢聯絡吳再升等先以馬隊
攻克赤灘賊卡復於距城七里之紀村地方設備夾攻遊擊田應
科等亦涉河擊賊賊敗不敢復出江長貴由茹麻司溪裏一帶進

擊將白華晏公堂賊卡一律燬平直抵城下甯國府知府顏培文等率團助剿閏三月二十二日江長貴等督軍齊進同時攻擊賊猶拒守吳再升率隊轟斃守陴賊目登時潰亂我軍先登斬關直入賊由西南兩路竄奔前署涇縣知縣劉西園等復率團掩殺當將縣城克復其由蘭山嶺等處竄遁者又經知府蘇式敬等截殺無算辦理尙爲妥速出力文武員弁准其會同周天受擇尤保奏以示鼓勵○丁丑諭軍機大臣等有人奏江南山東交界等處州縣緝捕廢弛商旅裹足等語據稱清江浦失事以後山東鄰城至江南宿遷一帶土匪蜂起遇有車輛過紅花埠峒嵒等處必先至牛馬莊劉姓家說明車輛行李數目按數計錢給予旗號派人護送方免劫掠否則貨物身命不保紅花埠一帶俱築壘挖壕劉姓係武舉名學駒又名一舉向頗能捍禦土匪近自捻匪蹂躪宿遷

桃源等處伊等糾合人眾器械堅利名爲團練鄉勇護送行旅愈聚愈多沿途似此者亦復不少實恐浸成禍端紅花埠等處係南北通衢向多土匪各借團練禦賊原所不禁但其中良莠不齊惟在地方官駕馭得法不特消患未形且可使爲我用若因循日久翦除愈難著文煜遴委妥員嚴密查訪設法辦理固不可徒事羈縻釀成巨患亦不可操之過蹙別滋事端將此諭令知之○諭有人奏陝西興安府屬毗連川楚咸豐六七年有自楚來傳邪教者不一其人隨地變易姓名有秦姓覃姓徐姓等人勸人喫齋念佛夜靜時演諸邪法信從者眾七年秋平利縣訓導史夢熊目擊情形曾經具稟本府經興安府知府林映棠委員查辦拏獲匪徒無幾管押數旬卽行釋放未經嚴辦習教者益無忌憚漸染至漢中府屬近山數百里比戶皆然輒坪廳有段光耀等窩藏匪類搶劫

民財暗置器械地方紛紛稟報而署同知徐奎並不緝究前遇荒旱徐奎託名拯饑變賣倉穀三千餘石約計錢一萬四千串至秋間豐收徧勒民間捐穀六千餘石以填官倉復侵吞二千餘石反以半施半賣捐廉填倉稟報上憲民間以其縱容教匪侵蝕倉糧形諸謠詠等語良民染習邪教例禁綦嚴似此地方官一味姑容必致養癰貽患見在川省賊勢蔓延儻與句結爲害非細著譚廷襄確切查明嚴拏懲治地方官有縱容諱飾諸弊卽行嚴參懲辦並將徐奎侵吞倉穀之案一併嚴查究辦以儆官邪將此諭令知之○戊寅諭軍機大臣等勝保奏道員苗沛霖欲帶練西來助剿已令侯程圩得手後由西路進兵專擣老巢兼顧豫疆並擬卽日馳赴鹿邑檄調該員前往面授機宜於皖豫兩省均有裨益等語道員苗沛霖督率練勇隨同官軍剿匪如攻克鳳陽府縣及臨淮

關等處均經出力此時復派練隨同傅振邦翁同書各軍助攻閩
圩沙河擒匪並親赴江口集劉伶口地方圍攻程圩甚屬勇往據
勝保奏稱該員與皖軍不睦不願聽袁甲三翁同書調遣此次西
來助剿並非皖軍調之使來苗沛霖疊經袁甲三等保奏並無齟
齬不合究係因何稍有不睦著袁甲三嚴密查明據實具奏見在
該練助攻閩圩等處正當喫緊之際自不可遽行撤退若該員駐
紮潁州一軍與勝保相距較近俟攻克程圩後亦可飭令分撥練
勇隨同進剿不必專歸該大臣調遣如能將各擒圩迅速掃蕩既
以肅清皖境即可保衛豫疆於北路亦爲有益卽著袁甲三等妥
籌辦理總期兵歸有用弗致稍爭分際致涉畛域之分將此由六
百里諭令知之○諭前因江南徐州河南考城地方均關緊要諭
令何桂清瑛榮仿照山東曹州河隄一律認真修築藉資守禦本

日據勝保等奏稱見由蘭考一帶查閱隄壕由龍門口至曹縣邊境隄長一百六七十里一律修竣並商辦集團分段扼守駐紮要隘互相策應足資守禦惟單縣迤東接連江省之豐沛蕭楊等縣一帶河隄直達清江若能照豫東章程挑築集練堵禦則濟甯充沂一路皆可借資保衛等語江南豫東交界地方捻匪出沒靡常時恐乘虛窺伺而豐沛等縣關繫三省衝要儻不嚴籌堵截之策勦辦終難得手何桂清接奉前次諭旨之後曾否辦有規模未據詳細覆奏卽著王夢齡等體察情形於豐沛蕭楊等處沿河一帶飭令地方官仿照豫東見辦章程勸諭民團一律修築以資保衛並卽繪圖貼說具奏毋得視為具文將此由五百里諭令知之○諭勝保奏前赴歸德辦團並見籌進攻情形一摺豫東各縣鄉團經勝保酌定章程選充團長抽丁備械沿隄守禦並互相援應各

條均尙妥協著卽覈實舉行毋得徒託空言以致有名無實各團練中果能齊心殺賊著有勞績卽著勝保等擇尤保奏以資鼓舞至苗沛霖所部練丁見在隨同攻剿斷不能遽行撤退該道員駐紮潁州一軍如與勝保相距較近俟攻克程圩後再行隨同助剿不必專歸該副都統調遣勝保馳赴鹿邑後惟當就見有兵力督同團保白穎毫一帶與皖軍互相聯絡節節進剿將孫葵心等各賊圩迅速掃蕩不得專駐歸德株守一隅將此由六百里諭令知之○諭本日據巴棟阿奏逆賊竄撲鎮江府城官軍疊擊獲勝並孤城危迫情形一摺本月初一至初六等日逆賊馬步數千至丹徒鎮焚擄旋即圍攻鎮江府城雖經在事文武登陣固守並副將向奎等屢出奇兵將西來賊匪擊退而東南兩路尙有屯匪其毗連鎮江之金陵句容丹陽以及東壩溧陽等處數百里之間徧地

皆賊孤城僻處江濱糧援隔絕文報不通實屬萬分危急和春見在退守常州前此潰散兵勇諒已陸續收集著卽迅撥勁旅由間道繞赴鎮江會合向奎等軍奮力擊勦力保危城至被陷之丹陽溧陽句容等縣城池並著和春嚴飭在事將弁分投攻勦迅圖克復何桂清見守蘇州自必布置嚴密徽浙援兵曾否趕到著與和春和衷共濟激勵軍心以期復還舊觀保全東南大局將此由六百里各諭令知之○己卯署陝西巡撫譚廷襄奏請挑練勇八百名派員管帶赴漢中興安一帶防堵川匪得旨卽使訓練精熟八百焉能敷用一經官手百弊叢生總應民捐民辦寓禦侮於自衛賊來固不容延蔓賊不來亦足以靖奸宄所請派員管帶之處不准行○庚辰諭內閣軍興以來疊經諭令各直省督撫勸諭紳民舉行團練京外官紳果有諳悉戎機者亦屢經降旨令其在籍辦

團藉資表率迫著有勞績經各督撫及各路統兵大臣奏聞亦無不立予恩施以示優異凡以官民聯爲一體卽盜賊無自生心正本清源莫要於是乃江南省城及皖南北各郡縣淪陷於賊久未攻拔近自高淳句容等縣不守丹陽繼陷蘇常一帶風鶴頻驚不免流離遷徙大江南北億萬生靈皆吾赤子久罹於水深火熱之中而莫之拯救深宮廬念晷刻難安大營兵餉何一非我民脂膏竭力供億原期共保安全乃和春等不惟不能迅奏膚功反令財賦之區致被蹂躪殊堪痛恨已嚴飭該大臣等激勵將士力贖前愆其守令等官與地方紳士亦應將守禦之法實力講求協助官兵同仇敵愾所有江蘇等省在籍紳士除業經奉有諭旨辦理團練外其明曉大體律身公正足繫人望者自不乏人卽著在京籍隸江蘇安徽浙江河南等省之大小官員將如何團練隨同官兵

助剿及防守等一切事宜務須統籌全局尤不可自顧鄉閭須與官兵聯爲一氣庶於防剿方能得力其如何辦理之處著各抒所見並各舉所知迅速奏聞毋得虛言搪塞該紳民等食毛踐土二百餘年諒能眾志成城以輔兵力之不逮朕實有厚望焉至於被脅難民要非甘心從逆其有真知悔悟自拔來歸者並著各督撫及各統兵大臣援照歷辦成案奏請免罪以示脅從罔治咸與維新至意○諭軍機大臣等前因金陵大營被陷和春等未能兼顧江北李若珠斗患痺證節經諭令都興阿或由舒桐或由霍六進兵與袁甲三等各軍聯絡聲勢駐紮江北進攻六合浦口天長等處見在逆首陳玉城在江浦糾合和州以西之賊意圖傾巢出犯江南潰兵紛紛渡江情形實爲危急和春等由丹陽退保常州大江南北文報不通江北一軍若非威望素著之大員統帥勢將渙

散設或江南之賊渡江與天長六合之賊合成一片則揚州等處亦將被擾著官文等統籌全局卽令都興阿迅赴揚州六合一帶與袁甲三各軍互相聯絡力圖進取以紓朕懷如舒桐霍六等處未能迅速行走卽由間道設法前往將此由六百里諭令知之○福建水師提督楊載福奏遵旨防守李陽河並進攻蟻磯獲勝情形得旨蟻磯地方能否據守若不能守迅將中壘攻克並將其餘三壘一律平毀勿令該匪再踞○命荊州將軍都興阿督辦江蘇江北軍務○辛巳諭軍機大臣等袁甲三奏江北大局喫緊見籌布置情形並請派大員專辦江北軍務一摺天長六合逆匪糾集大股擄取民船勢將水陸併力東犯揚郡及裏下河等處均形喫重袁甲三見派副將黃開榜管帶礮船三十隻東下督同前次派往之遊擊張得魁等礮船三十隻由蔣壩三河下抵寶應高郵等

湖往來巡防並酌添漁划協助兵船以杜賊匪竄渡所籌尙屬周
 妥惟水路兵勇必須陸兵協助方可聲勢聯絡總兵鶴齡見防衛
 陽安勇見防三河著王夢齡卽行飛飭該總兵等與水路師船聯
 爲一氣以期互相援應力遏賊鋒至江北統兵大員已諭令都興
 阿督辦江北軍務與袁甲三各軍互相聯絡矣清淮一帶地居衝
 要已降旨令王夢齡迅赴漕督署任著卽妥籌布置督率兵勇鼓
 舞鄉團與水陸諸軍聯絡防堵毋稍鬆懈將此由六百里各諭令
 知之○予安徽殉難知州尹寶珪等祭葬世職○壬午諭軍機大
 臣等據喬松年奏江南軍情益急江北餉需益絀並陳江防喫緊
 情形一摺據稱自丹陽失守以後賊匪四竄如丹陽辛豐諫壁大
 港等鎮圖山關皆被賊擾並擄船希圖北援常郡萬分危急江南
 糧臺未知移退何地無錫有地名皇甫墩尙可扼守如賊再越此

而南則蘇州更無險可恃著何桂清迅速妥籌扼要堵截見在江
南逆勢猖獗惟恃長江可以阻遏江面艇船不少所有應發口糧
每月約計在十萬兩以外江北糧臺所籌之款尙不敷揚州兵餉
而水師餉精需用尤殷著卽飭江南糧臺趕緊將此項口糧迅籌
給發如在常熟縣設立糧臺則水師可由狼山對渡前往支領當
此軍情棘手之時總期士飽馬騰力扼長江之險杜賊北竄並保
全東南大局何桂清見守蘇州不能置常州於不問務與和春激
勵軍心互相援應力圖規復迅速逆氛見在軍情若何地方一切
情形若何日久未見續有奏報著迅速詳細具奏以慰朕懷儻因
道途梗阻文報難通卽著探明路徑繞道前進或由常熟縣福山
海口對渡通州從泰州泰興至高郵寶應一帶亦可馳遞北上著
相度情形妥籌辦理將此由六百里諭令知之○諭前因逆首陳

玉城在江浦糾合和州以西之賊意圖傾巢出犯當諭官文等令都興阿迅赴揚州六合一帶督辦江北軍務本日據喬松年奏探聞鎮江尙能固守賊於四鄉焚掠將入江陰境內且擄有船隻希圖伺便以渡江北而擾瓜揚常州城外各營已潰郡城被圍無錫鄉間已有賊蹤等語江南大營潰退以後和春等退保常州情形萬分危急無錫爲蘇州屏障如賊再越此而南蘇州無險可扼東南大局將不可問曾國藩規取安慶頓兵堅城即使安慶得手而蘇常有失亦屬得不償失爲今之計自以保衛蘇常爲第一要務著官文曾國藩胡林翼熟商妥議統籌全局卽令曾國藩統領所部各軍探明道路赴援蘇常以顧大局或未能深入救援亦可扼截江面以杜北竄其安慶等處並著官文胡林翼等嚴密防範毋令上竄將此由六百里各諭令知之○諭前據王有齡奏派兵勇

二千三百餘名赴常州聽候何桂清等調遣復據張芾奏金陵大營失利派江長貴率所部二千餘人並由周天受於甯防選派精銳二三千人一併交江長貴統帶馳援本日據喬松年奏探報常州城外各營已潰賊圍常州分擾四鄉無錫鄉間已見賊蹤等語丹陽失守和春退保常州何桂清赴蘇州籌防張國樑尙無下落日久未見續報若如喬松年所奏是蘇常情形岌岌可虞亟應迅集援兵以冀挽回萬一著張芾飛飭江長貴統帶各軍星夜馳赴蘇常並著王有齡再行酌撥兵勇飛速應援不准稍有延誤如浙軍不敷分撥所有援浙之閩兵三千當已陸續趕到卽著催赴蘇常以厚兵力江南大營潰退兵勇勢成渙散全賴皖浙兵勇救援張芾王有齡務當隨時偵探相機策應是爲至要將此由六百里各諭令知之○諭昨有旨令王夢齡馳往淮安妥籌布置茲據喬

松年奏稱株守淮安一城仍無裨益請飭該署漕督駐於高郵等語淮安地當衝要於江北地方可以統籌兼顧若移紮高郵去揚州雖近而與淮徐一帶相去較遠地方事務情形恐有格礙喬松年既稱高郵南顧揚州北顧淮安該處地方較淮安尤爲扼要著王夢齡察看情形是否可以移紮斟酌辦理總期南北兼籌毋令顧此失彼將此由五百里諭令知之○諭江南大營自丹陽失守以後文報不通據喬松年奏稱九洲洲全軍撤退常州被圍無錫已有賊蹤鎮江之賊四鄉焚掠已入江陰境內且據有船隻意將伺便渡江而北等語見在和春等節節退守未能兼顧賊蹤北竄在在堪虞李若珠防剿江北是其專責著卽整飭將士激勵軍心嚴密防守所有李德麟吳全美等師船均著歸該提督調度卽著督令水師上下梭巡與楊載福師船聯爲一氣嚴防江面毋令賊

船北渡擾及瓜揚並派兵扼剿天長六合一帶以固北路藩籬
令匪蹤北竄朕惟李若珠是問決不寬貸懷之○命河南山東山
西陝西各巡撫迅撥協餉解赴江北糧臺以備要需○癸未諭內
閣何桂清奏官軍失利見往常熟照料糧臺並自請嚴議等語兩
江總督何桂清駐紮常郡爲策應大營後路乃自丹陽失守卽思
前往蘇州見又展轉退至常熟以照料糧臺爲詞希圖掩飾實屬
畏葸無能有負委任何桂清著卽革職來京聽候審訊○諭軍機
大臣等昨因常州被圍蘇城危急當諭曾國藩赴援蘇常扼截江
面以顧大局本日據何桂清奏常州失利和春等退至潁墅關何
桂清退守常熟見在常州岌岌可危無錫又有賊蹤可以徑犯蘇
城江南大局幾同瓦解曾國藩接奉此旨卽統率所部兵勇取道
甯國廣建一帶徑赴蘇城相機兜剿以保東南大局毋稍遲誤道

員劉千濤一軍所帶兵勇四千餘人頗多精銳見駐東流一帶地近江南卽飭令取道徽甯隨同赴蘇援剿知府蕭翰慶一軍見在規取池州亦卽飛調赴營隨同前進不得調回湖北致有貽誤此兩軍半係曾國藩舊部均歸節制必能得力此外湖南湖北兩省如有可調之兵並著官文悉心籌畫酌量調撥陸續進發以厚兵力江南糧臺遷移無定軍火缺乏並著官文等籌備餉糈源源接濟目下軍情緊急曾國藩素顧大局不避艱險務當兼程前進保衛蘇常次第收復失陷地方重整軍威肅清醜類朕實有厚望焉將此由六百里加緊各諭令知之○諭據王有齡奏蘇常軍情喫緊請飭江西省分兵援應等語江南軍務自丹陽失陷後節節潰退和春已屯紮許墅關何桂清退至常熟常州未知能否固守蘇州亦岌岌可虞已命曾國藩帥師往援亟須厚集兵力以資攻剿

所有劉于溥一軍已諭知曾國藩調往助剿著毓科卽飭該道員迅速前進此外如有可撥勁旅並遴委得力將弁管帶卽日馳赴蘇州歸曾國藩調度見在蘇州軍情緊急援兵口糧倉卒之間恐一時無從籌給並著毓科籌備酌量毋使臨時缺乏致成掣肘將此由六百里諭令知之○諭昨旨蘇常危急諭令張芾飛飭江長貴統帶各軍馳往援應本日據何桂清奏常州失利退守常熟復據徐有壬奏蘇省危急催調各路援師各等語逆匪分撲常州城外各營相繼失守和春因賊匪鈔過東北不能進城見在退守許墅關雖未據和春奏報而賊勢猖獗兵勇潰散情形已不可問見在江南軍情萬分喫緊必須厚集兵力以保全大局徽甯兩防距江蘇較近著張芾卽飭江長貴統帶各軍飛速前往並著周天受將前派甯防兵勇一併交江長貴統帶馳往蘇常相機援剿不准

稍有延誤蕭翰慶一軍已諭留國藩調往助剿著卽飭令迅速前進此外如有可撥之兵亦可酌量調往其廣建一帶地方緊要仍著周天受實力防剿毋令該匪分股闖入江南糧臺尙無定處著將所派兵勇應需糧餉先行籌備以利軍行而免貽誤將此由六百里各諭令知之○何桂清奏金陵軍潰丹陽已失和春退至常州軍務須歸督辦而蘇州尙無準備故臣赴蘇駐紮以繫民望乃撫臣徐有壬傳諭各門不准總督衙門之人入城屬臣在無錫望亭紮營不知臣本係積病之軀又非武將焉能打仗所部止有五百人又無鍋帳臣於四月初二日在無錫截留潰散兵勇二三千人次日卽聞常州失利和春許乃釗亦至潯墅關和春遂親統截留馬步兵勇駐紮關上廣西提督張玉良在無錫紮營防剿總兵曾秉忠統帶長龍船七八十隻防無錫水路將帥旣來責有攸歸

矣至所帶銀錢業已用罄蘇州於所有兵勇糧餉軍火鍋帳一概不發和春之兵漸漸散去而總理糧臺查文經不知移往何處風聞其在常熟臣與和春商議親赴該處徧覓無蹤無餉可籌無糧可支智勇俱困次日常熟昭文二縣與眾紳商議用印票借銀一千兩暫爲給發東南大局深恐難支得旨聞風先逃民望何在該大臣既抵常州有兵有將一勢自應更壯何畏蒞若此又批無異於程裔采之奔回長沙又批試問覓一糧臺委員願總督之事耶○命江西巡撫毓科撥擡槍五百桿烏槍二千桿火藥三萬斤火繩五萬盤鉛丸五萬斤解赴浙江備用○賞前任侍郎曾國藩兵部尚書銜署兩江總督未到任前以江蘇巡撫徐有壬兼署○命江蘇布政使薛煥署欽差大臣辦理五口通商事宜○甲申諭內閣戶部奏軍需鉅款延不造報請旨飭催一摺廣東自道光三十

年起本省軍需前後支應爲數甚鉅僅將二年動用軍需奏報一次餘俱係籠統約略之數其歷年防勦處所調派兵勇及動用糧餉若干並何員經理支放事越十載總未造報節經該部奏催置若罔聞以致漫無稽考實屬任意延玩見當經費支絀之時似此鉅款豈容日久因循著勞崇光耆齡查明歷任司道及辦理軍務各員先行奏參交部嚴加議處一面將該省疊次防勦處所支用軍需確實細數遵照歷奉諭旨按限分晰造冊報銷自此次嚴催後儻再藉詞延閣以及造報含混著戶部參辦以重帑項 曾國藩奏前奉諭旨命 臣等令都興阿酌帶馬步四五千人馳赴江北等再三籌商都興阿之軍須從皖北各營中抽調兵力已不能不分此刻安慶賊勢尙強 臣若盡撤以赴蕪湖甯國則桐城之師不能獨立該逆若再乘機上犯楚疆必將應接不暇 臣處自肅啟

江張運蘭撥赴楚蜀後不獨將領無獨當一面之才且兵力亦甚單薄難當巨寇目下賊勢全趨常蘇如常州不支斷非進攻蕪湖一著之所能牽綴者此臣軍不能舍安慶而趨蕪湖之實情也諭旨又以左宗棠戰勝攻取調度有方應否令其仍在湖南襄辦團練臣查左宗棠剛明耐苦曉暢兵機當此需才孔亟或飭令辦理湖南國防或飭赴各路軍營襄辦軍務或破格簡用藩臬等官予以地方俾任籌兵籌餉之責均候聖裁無論何項差使惟求明降諭旨俾得安心任事必能感激圖報有裨時局臣前奏調蕭啟江張運蘭兩軍未蒙俞允蕭啟江見在援蜀勢難調回張運蘭駐防郴州見尙無賊臣已咨商湖南撫臣駱秉章如果軍事棘手擬再調其前來以厚兵力○上諭軍機大臣等前因蘇常危急諭令曾國藩帶兵赴援昨復降旨令其統率所部兵勇取道甯國廣建

一帶徑赴蘇州本日據曾國藩覆奏賊勢全趨蘇常斷非進攻蕪湖所能牽綴所奏自係實在情形惟蘇常爲東南財賦之區必須力籌保衛以全大局輕重相權不能不先其所急楚軍旣不能進攻蕪湖但於安徽一帶嚴密扼截亦足堵其上犯曾國藩見署兩江總督軍務地方均屬責無旁貸著卽遵照前旨迅速馳赴蘇州相機援剿將此由六百里諭令知之○諭曾國藩見已有旨署理兩江總督令統率兵勇取道甯國廣建一帶徑赴蘇州相機兜剿該署督所部兵勇不多且統帶乏人恐不足以當大敵所有張運蘭一軍著駱秉章卽飭赴曾國藩軍營聽候調遣湖南如有可調之兵亦著酌量調撥以厚兵力將此由六百里諭令知之○諭都興阿奏遵旨啟程馳赴皖北相機進剿一摺江南軍情緊急江北又無重兵賊匪北竄堪虞都興阿旣赴省城著卽與官文會商籌

撥馬步各隊統帶啟程相機進取毋稍遲誤將此由四百里諭令知之○諭曹澍鍾奏在川官兵是否會商督臣調派抑專歸節制等語曹澍鍾見由粵西馳赴四川辦理軍務所有四川在事文武以及各路兵勇自應歸其統率節制著卽於行抵川境之日卽行知各路軍營以一事權曹澍鍾歷任有年情形熟悉經朕特派專辦四川軍務尤當整頓軍旅妥籌布置迅除醜類以保完善之區將此由六百里諭令知之○諭據戶部奏籌議伊犁放餉章程擬頒發官票試行等語伊犁各城欠餉近年愈積愈多若因地利以贍兵精亦裕餉之一策該處向有額徵地糧道光年間續墾新地已著成效該將軍等務當悉心查勘凡有間荒可墾之處速爲開墾惟此項工本無出若照皖豫餉票捐輸章程由兵餉放出官票再於捐項收回所收捐項作爲捐輸開墾工本分次請獎以濟餉

需著卽照該部所請頒發官票四十萬兩交扎拉芬泰等支放該將軍前以放餉三成兵食不敷請俟十一年以五成估調今既有頒發餉票所有伊犁及各城兵餉著提早一年自本年爲始於三成實銀外先加放官票二成共爲五成抵發舊欠以示體恤如餉票流通不但開墾有資且與兵食有益該將軍等務當妥爲籌辦將此諭令知之○命兵部郎中左宗棠以四品京堂候補襄辦署兩江總督曾國藩軍務○乙酉和春奏臣馳抵丹陽探聞逆匪將以全力來犯當卽函致張國樑帶兵前來時張國樑在鎮江收集潰兵二萬數千名以一萬餘名歸總兵馮子材留防鎮城自帶一萬三千人於閏三月二十三、四兩日先後分起到防張國樑於二十五日出城踏看地勢值久雨路滑坐馬倒地壓傷甚重仍日與在事鎮將悉心籌畫無片刻閒祇以賊信愈緊二十九日帶傷督

隊於東南添築營壘而令王浚熊天喜於營前五里外黃土橋地方分左右兩翼整隊以待黎明大霧該逆冒我旗幟數道並進突至王浚軍前搏戰約一時許斃賊無數王浚中槍墜馬殞命賊遂乘之其眾大亂熊天喜見右軍已潰卽行馳救復被包鈔遂持短兵殺賊甚厲亦以力竭陣亡張國樑見前軍皆敗賊已蠶擁前來立卽督隊擊退數里斬馘不可勝計而逆援愈聚愈多自寅至午相持五時之久詎料另股逆匪見城西土山可以俯瞰全城環攻我營退而復進者十餘次遂於午初爲其所破卽又下山進犯西門長橋副將蔡其榮禦於橋上賊不能進旋因中槍落馬賊遂過橋直抵城圍城上居民拋擲輒石呼噪殺賊而土山之賊以礮俯擊城上守陴兵不能支賊卽梯城而上城中大亂臣等見城不守惟有退保常州尚可屏蔽蘇垣遂與許乃釗出城東門張國樑見

西城上已豎賊旗知不可爲亦卽上馬擬過東門長橋與臣等會

議而潰兵壅阻馬不能行賊已追及卽策騎躍水而過河深人眾

遂沒於水臣與許乃釗於三十日抵常州與督臣何桂清會晤何

桂清次日卽離常州提臣張玉良總兵馬德昭於常州東南一帶

度地紮營惟西北尙屬空虛恐爲所乘臣抵常之日聞賊已竄奔

牛鎮屬張玉良收集潰卒營於西北初二日賊以數股來犯東南

以大股步賊攻西城張玉良親自帶兵往援鏖戰良久臣見眾寡

不敵賊由西北竄近卽親督小隊馳援乃未及接仗忽有槍子飛

中胸前幸未墜馬賊騎已鈔至東路營盤盡失臣欲回城而門已

閉城內僅守兵千餘與民同守臣等不得已在無錫清明橋隘口

速收潰兵以圖內因錫邑進援常城張玉良已在離無錫城二十

里之高橋及十里外之黃埠墩等處修卡築營並又檄調候補道

吏保悠所募巢湖義勇三千名俟到防後兵力稍足卽當進援常州查常州城內米糧火藥尙多民心固結尙能守禦惟恐爲日過久力難支持幫辦軍務江南提臣張國樑忠勇謀略冠絕一時屢摧大敵口不言功厚養戰士家無私積東南眾志賴以維持雖古名將無以過之今賊餒方張而將星忽質三軍之士莫不同聲痛哭合無仰懇天恩飭部從優議卹於江浙兩省及死事地方並其原籍建立專祠地方官存卹其家以彰忠藎其湖北提督王浚壽春鎮總兵熊天喜亦皆屢著戰功同時殉難相應請旨一併飭部議卹兼署兩江總督江蘇巡撫徐有壬奏自秣陵大營潰退丹陽又復失守和春退至常州城中恃有重兵在前人民均未遷徙糧臺所在火藥米糧銀兩均各充足城垣亦壕深壁峻實堪固守乃督臣於閏三月三十日聞丹陽失守見和春一到卽魂亡膽落

立思逃避當時常州紳士聞督

臣

有退避意公同進謁涕泣慰留

督

臣

情急遂於次日將親軍小隊擺成隊伍黎明時突開東門與

和春查文經衝突而出是日常郡紳民耆老頂香跪留者不下數

千人督

臣

竟令小隊開槍轟擊而逃聞當時士民被擊而死者十

有一人其被烏槍及刀矛傷損者更有百餘名之多初二日賊犯

常郡張玉良一戰而潰督

臣

意欲來蘇次早舟泊許墅關先令委

員持函見

臣

曲述避敵之意是日蘇省人民聞督

臣

將至人聲鼎

沸兼之敗勇逃兵來如潮湧頃刻間蒼黃萬狀督

臣

若來卽恐登

時大變隨飛飭吳縣知縣沈偉田等到關闌阻並述閭閻惶擾情

形懇督

臣

折回無錫督

臣

接信後雖未來蘇連日差探並無音耗

初七日遊擊華封來見云督

臣

避至常熟之十里亭所帶親軍小

隊竟在彼放火劫掠居民異常惶怖人心頓形渙散

皇上待諸

臣不薄一旦有事俱思巧爲規避置地方民生於不問實屬天良漸滅而常州城中自諸

臣

退避後該郡士民竟能登陴固守相持

已旬日之久是該郡城並非不可固守之明證使督

臣

果能堅守

安見不能阻遏兇鋒屏蔽蘇杭財賦之地

臣

孱薄陋劣豈能以一

質障江河賊到蘇城

臣

祇一死以報

皇上惟

臣

不能補救時艱

雖死不足以塞責耳又奏四月初八日據張玉良函稱該逆初四

日由小路繞過常州竄至距無錫六十里之戚墅堰放火搶劫經

張玉良督隊迎勦殺賊多名賊卽退去常州府城見尙固守張玉

良卽在距無錫二十里之高橋地方扼要駐紮初九日賊匪復自

高橋分路來撲並有礮船十餘隻沿河而下經張玉良飭調兵勇

礮船分投迎擊賊退至距高橋數里地方築營等語

臣

思大營潰

退賊勢鴟張常郡尙未解圍該逆又竄近無錫雖有張玉良一軍

駐紮但自丹陽以下處處可通儻大股直撲蘇省則張玉良一軍首尾受敵亦難兼顧省垣所存兵勇僅一千餘名臣飛飭添雇壯丁一萬二千餘名分布城廂內外會同團練按段巡防所調各省官兵迄今未到伏懇 聖恩俯念蘇省情形危迫飭下各路統兵大員迅速調派精兵星夜兼程來蘇以冀轉危爲安又奏本月初二日賊匪攻犯常州府城和春親自帶兵出城迎敵胸受槍傷不省人事跟隨人等背扶衝圍而出至無錫城外養傷嘔血不止熱毒內陷飯食不進延至初六日未刻嘔血數口而逝並准許乃釗委員齎送欵差大臣關防及江甯將軍印信二顆前來臣思大營兵勇甫經潰退張國樑至今尙無下落和春又復傷亡大局不堪設想見在許乃釗馳赴無錫會同張玉良料理軍務伏乞 聖恩迅賜簡派統兵重臣帶領勁旅剋期前來以扶危局和春自督師

勦賊以來厥功甚偉此次以兵勇潰退督隊受傷齎志而沒情殊堪憫可否仰懇 天恩飭部從優議卹 上諭內閣前因何桂清展轉退至常熟當降旨革職來京聽候審訊茲據徐有壬奏何桂清自丹陽失守卽已膽落立思逃避經常州紳士涕泣慰留乃何桂清突開東門而出其紳民耆老跪留者竟被兵丁擊傷多名逃避至常熟之十里亭所帶親軍在彼放火劫掠種種情節實出情理之外何桂清自丹陽失守後既不能固守常州阻遏兇鋒以總督重臣輒思逃避且於士民涕泣挽留尙忍心害理擊傷多人以冀脫逃縱容親軍放火劫掠震動地方見在常州紳民尙能登陴固守而該督節節退守置地方民生於不問實屬殃民誤國何桂清著卽鞫問交徐有壬派員押解來京聽候審訊○諭徐有壬許乃釗各奏督師大臣擊賊傷亡並代遞遺摺懇恩賜卹各摺片欽

差大臣暫署江甯將軍和春督師江南前因金陵大軍退守鎮江當經降旨將其革職仍暫署理江甯將軍留於江南督兵以觀後效茲據徐有壬等奏逆匪攻犯常州府城和春親自帶兵迎敵胸前重受槍傷衝圍而出火毒內陷嘔血身亡和春自廣西轉戰數省由安徽至江南數載以來戰功卓著茲雖兵機屢挫尚能血戰捐軀殊堪憫惻和春著開復革職處分照將軍例賜卹以慰忠魂尋予祭葬世職諡忠壯○諭曾望顏奏各路官軍剿賊大勝一摺四川逆匪分股從止戈場等處直竄洪雅經署重慶鎮傅琨等過河截剿轟斃甚多閏三月二十六二十八等日賊匪乘筏渡河分竄三寶寺等處參將馬旭林等會合進攻提督占泰派令守備唐友耕等帶領兵勇由夾江渡河迎剿當將雙福場收復追殺十數里生擒偽總統李興發等多名正法梟示占泰探知賊匪圍撲岷

眉隨卽督隊馳往壘有斬擒踏平賊壘城圍遂解藍逆退踞大廟
山大佛寺一帶築壘抗拒我軍分路進擊遊擊琦克坦泰一軍將
賊營全數攻毀斃賊一千餘名生擒一百七十三名內有僞統領
王和尚等十五名其竄擾樂山縣等處賊匪亦經各處兵練隨時
截剿斃賊不可勝計辦理尙爲得手著飭各處帶兵大員乘勝進
攻毋畱餘孽○諭軍機大臣等本日據徐有壬奏督臣節節退守
並賊偏蘇省和春傷亡各摺片又據許乃釗奏請簡放統兵重臣
等語前因蘇常危急命曾國藩署理兩江總督統帶兵勇內廣建
馳往救援並諭張芾周天受飛催各軍星夜馳援兩湖官兵亦諭
官文酌量調派惟各路援兵一時未能趕到徐有壬惟當激勵兵
民固守蘇州張玉良見在無錫高橋地方駐紮著卽收集潰兵奮
力攻剿總須在蘇州之北擇要截擊兼可進援常州方爲妥善該

提督見署欽差大臣關防所有楚皖援兵及王有齡所派之兵均歸其節制卽設法妥爲布置以期保全蘇常是爲至要將此由六百里加緊各諭令知之○諭本日據徐有壬許乃釗奏和春受傷身故蘇州危急情形各等語見在常州被圍賊偪蘇州鎮江一城關緊緊要恐該逆乘虛竄擾著巴棟阿實力防剿勿稍疏失江甯將軍已降旨令魁玉署理著巴棟阿知照令其收集滿洲官兵會同駐守鎮江協力防剿務與張玉良互相關照聲息相通以免貽誤見調各路援軍當可陸續趕到蘇常剿辦得手則鎮江愈形喫重巴棟阿務當會同魁玉激勵防剿各將弁悉力固守相機截剿是爲至要將此由六百里諭令知之○諭本日據傅振邦奏陣擒巨逆痛挫賊鋒等語逆首李大澹與張龔二逆同時糾眾膽敢分列五旗實屬罪大惡極該提督以該逆願招所屬趙浩然等三十

餘圩暫行幽禁意在勦撫兼施惟此輩狼子野心深虞反覆果能設計攻取各圩原可省我兵力若所言未足憑著卽立正典刑毋貽後患將此由六百里諭令知之○諭本日據玉明奏漕船在山東洋面被夷船截搶該夷復在船演放礮位並有夷船二隻向青泥窪行駛各等語據稱金州和尚島口外有火輪船一隻停泊並江南金永康等商船在山東洋面被劫初八日該夷火輪船一隻向東南洋駛去復有該夷劫來丁游船一隻與前劫商船一隻停泊據被劫船戶登岸聲稱由上海裝運漕米行至威海城山頭被火輪船截搶帶至青泥窪口原人俱令登岸每商船有夷人五六名並不交給原票前後共劫去商船六隻並將船身另塗白色欲改修火輪船帶赴天津打仗該夷復在船演礮驚駭鄉民又有白布篷船一隻四桅重疊篷大夷船一隻向青泥窪行駛等語該夷

截搶漕船塗改船色扣留商船原票情殊叵測難保非漢奸假稱被劫商船登岸窺探虛實更難保該夷不藉此船隻潛載夷兵扮作商船執持照票滙入各口隨處埋伏著僧格林沁等密飭將弁嚴爲防備俟漕船進口時嚴密盤查庶免墮其奸計將此諭令知之○諭玉明奏漕船在山東洋面被夷船截搶並在青泥窪游駛演放礮位等語該夷肆其凶悍情殊叵測著玉明嚴飭西拉布加意嚴防如該夷非大隊登岸深入滋擾不可先行開礮致該夷有所藉口其濱海口岸並著玉明嚴飭隨時豫防不得稍形疏懈該船戶裝運漕米有無押運弁兵原領票照又被夷人扣留無憑查驗難保非奸細假冒登岸窺探更難保不藉此船隻持票滙入各口尤應確查嚴備著西拉布傳齊被劫船戶水手逐層盤詰務得確情並飭沿海各口弁兵遇有商船停泊加意盤查毋墮奸計將

此由五百里諭知玉明並傳諭西拉布知之○何桂清奏和春溘
逝兵勇解體大局搖動非臣書生所能支持得旨平時無事侈談
彼短一旦決裂尙不自知認罪猶以書生自居可歎可恨殊有負
書生兩字○幫辦軍務四品京堂許乃釗奏張玉良在無錫擊賊
獲勝情形得旨張玉良雖未大勝究可望其漸能鼓勵軍心○命
廣西提督張玉良署欽差大臣督辦江南軍務○予江蘇陣亡湖
北提督王浚祭葬世職諡勤勇安徽壽春鎮總兵官熊天喜祭葬
世職○予雲南陣亡訓導丁榮善等祭葬世職○丙戌巴棟阿奏
大股逆匪竄撲鎮城經官軍擊退日則潛伏山坡夜則時張燈火
見我城守嚴密未敢近前臣與在城文武竭力固守由總兵馮子
材副將向奎酌帶兵勇分投追剿鄉團隨同兜拏斬獲甚多該逆
由丹徒馬陵竄往吳家橋大港一帶孟河近在咫尺賊又窺伺常

州據逃出難民供稱賊因鎮江防守甚嚴計無可施意圖先竄蘇常另調悍逆傾巢回撲合無仰懇 天恩迅飭各路統兵大臣飛調雄師數萬取道鎮江會合攻剿以遏兇鋒 上諭軍機大臣等本日據巴棟阿奏逆匪竄撲鎮江官軍擊剿獲勝見已解圍賊由丹徒馬陵遁去並探聞有調另股悍匪傾巢來撲之信請派兵往援等語此時張玉良尙駐常州以南恐難兼顧鎮江賊匪去而復至實在意中鎮江設有疏虞則瓜揚益難固守著李若珠勤加偵探如逆匪果再竄擾鎮城卽行派撥水師前往實力援剿不得稍存膜視其江面上下游仍督同李德麟吳全美等會同楊載福水師嚴密梭巡毋稍疏懈致賊北渡至天長六合等處逆裔亦正鵠張揚州防剿極關緊要李若珠駐紮該處責無旁貸務當督率弁兵認真守禦相機攻剿是爲至要○戊子諭軍機大臣等本日據

王明奏金州海口疊見夷船劫畱商船並搶劫銀兩一切情形又據文煜奏夷船闖截漕船商船見在暗爲防範各一摺沙船運米到津前數月未聞有被火輪船搶劫之事何以此時紛紛被劫且有致斃人命之事實堪詫異難保非冒充英佛之人所致著薛煥一面照會英佛二國查詢如係該國之船務須嚴行禁約免起爭端儻有別國冒稱英佛二國者中國無從辨別卽由該二國查明照覆一面飭令商人仿照前次該夷欲截漕船眾商與之爭論之意向其理論爾等既絕我等生計只好從此罷市薛煥須相機從中調處斷不可令其決裂是爲至要將此由六百里諭令知之○山東巡撫文煜奏遵查劉一舉卽劉業居江南宿遷藉端需索乘機搶劫並分咨會剿情形得旨著卽飛咨王夢齡嚴密查拏東省亦勿得稍分畛域一體協緝○己丑諭軍機大臣等前因江南軍

情危急特命張玉良署理欽差大臣關防總統諸軍所有各路援兵悉歸節制本日據毓科奏探聞蘇常軍情緊急已派駐防浮梁吉安之副將文瑞劉芳貴等帶領兵勇共三千八百餘名馳往蘇省援剿並據張芾奏已商令肅翰慶一軍馳赴甯國取道廣德馳援蘇省各等語以上各項援兵並前次派令赴援之江長貴所統各項兵勇計已陸續到蘇徐有壬毋得擅行截畱卽著催赴張玉良大營聽候調遣分撥各要隘並令克復各城張玉良總統諸軍著該提督於各營得力鎮將內遴選一人具奏作爲協理軍務許乃釗係屢經獲咎之員著卽撤去幫辦仍畱於張玉良軍營辦理文案糧臺見在移設望亭仍著查文經督辦應需兵勇口糧卽著徐有壬源源接濟聞廬鳳道蕭盛遠前在和春軍營聲名甚屬平常著先行撤任交張玉良徐有壬詳查該員劣蹟嚴參懲辦毋許

仍畱大營至蘇郡見有兵勇總須於城外多紮營盤以資策應毋得聚守城中致蹈杭州覆轍將此由六百里各諭令知之○以建平縣城被賊竄陷張芾下部議處○辛卯諭軍機大臣等本日據何桂清奏兵勇再集再潰宜擇要堵扼又據庚長奏江南猝遭蹂躪江北亦萬分危急各一招前降旨令張玉良已赴蘇州鎮江瓜州聲制江南各軍見在無錫兵勇復潰張玉良已赴蘇州鎮江瓜州聲息已隔水師無人統轄江陰文報亦復阻絕艇師紅單各船自大營潰後餉道不通據何桂清奏宜在常熟福山一帶扼守江海要區以通消息並設立糧臺以濟水師庚長亦稱艇船因南路不通無處領餉水師各船原以扼截江面若糧餉不繼勢必渙散張玉良既總統各軍亟應力籌全局設法疏通餉道俾水師得以保衛瓜鎮一帶福山口路程迂遠尙恐緩不濟急本日已諭喬松年先

行就近接濟水師軍餉徐有壬仍當亟籌餉需接濟水陸諸軍不得專恃江北接濟又據庚長奏六合之賊已竄至揚州西北公道橋地方築壘並在高郵對湖之菱塘橋打館窺伺李若珠近在揚州自應迅速堵剿儻該革提督不勝重任卽著張玉良另派得力大員接辦揚州軍務毋得瞻徇情面致誤大局本日已諭王夢齡調兵進剿公道橋一帶賊壘惟兵力尙單必須添兵策應並著張玉良斟酌辦理將此由六百里加緊諭令知之○諭本日據何桂清水師無人統轄又據庚長奏江面艇船因南路不通無處領餉各等語前諭李若珠督飭李德麟等師船於江面梭巡毋令江南賊匪北竄見在大營潰退餉道不通若不急籌接濟水師恐有渙散之虞揚州兵勇多調赴江南所有江北糧餉諒必有餘著喬松年迅速籌撥水師兵餉源源接濟毋許藉詞推諉致有貽誤並著

李若珠懷遵前旨督飭李德麟等嚴扼江面以杜該逆北竄據庚
辰奏六合賊已竄至揚州西北之公道橋地方築壘並在高郵對
湖之菱塘橋打館窺伺李若珠近在揚州何以置若罔聞本日已
諭王夢齡調兵進剿著李若珠卽親督兵勇奮力會剿毋得觀望
遷延致干重咎○諭本日據庚辰奏六合之賊兩路窺伺意極叵
測江北裒下河尙爲完善之區見在潰敗兵勇及逃來難民不下
數萬餘人深恐羣聚滋擾等語清淮一帶原有安勇鶴齡帶兵防
守蔣壩衡陽以防賊匪內竄茲六合匪徒已至揚州西北之公道
橋及高郵對湖之菱塘橋打館是賊已內竄卽可直達清淮雖守
蔣壩衡陽亦屬無益著王夢齡迅速馳赴淮安卽於安勇鶴齡兩
軍內抽調一軍飭令前赴揚州設法攻毀公道橋等處賊壘並將
菱塘橋打館賊匪擊退以消內患至王夢齡應駐紮何處仍著酌

度形勢辦理將此由六百里加緊諭令知之○諭有人奏杭州北新關爲商賈輻輳之區近來弊竇叢生自南關至北關穿城二十餘里河流狹小關吏剋爲五日十日滿限之例故使笨船閣擁貨船不得速行一經滿限雖南關已經報稅北關仍復重徵自北而南亦如之以致行商裹足等語杭城南經收復籌餉之要自以通商爲第一若如所奏重徵苛斂悉飽私囊商販不通於國課餉綑大有關係著王有齡卽飭該關監督嚴密訪查如有前項弊端卽行嚴拏懲辦又稱前湖南道員署按察使俞焜病中擊賊被戕最烈前任兵部侍郎戴熙與其弟廩生戴煦投水殉難仁和縣知縣李福謙在圍城中偵知賊窀地道奔告巡撫司道請兵護城皆不爲意憤極自盡貽書當事俱未之信未幾而城遂陷孤忠苦節深堪憫惜著王有齡查明該員等死事情形奏明請卹此外同時殉

難人員將一併查明奏請旌卹以慰忠魂將此由五百里諭令知之○張芾奏皖浙毗連未敢撤防前赴江浙得旨前已有旨令汝仍駐徽防見雖有徐有壬王有齡咨令援浙惟徽甯之防遽撤實於大局攸關止可催江長貴等援兵迅速前往以濟眉急○江西巡撫毓科奏接濟兵餉動撥道庫並各屬正項漕折等款銀數得旨邊防所需何至動輒二十餘萬一飭協濟鄰封則備陳苦狀若果爲保衛地方起見他省何異於本省可見未必實濟於兵勇影射彌縫甚且侵蝕可勝言哉著戶部查覈該省兵勇數目認真覈議具奏若具報兵冊遲延不必再催卽行參奏○壬辰賜鍾駿聲等一百八十三人進士及第出身有差○諭內閣前浙江巡撫羅遵殿殉難杭城當經降旨照巡撫例從優賜卹茲據御史高廷祐奏封疆大吏誤國殃民百身莫贖請撤銷卹典等語羅遵殿城破

捐軀妻女同殉是以給予優卹嗣又博採眾論皆言杭州賊已攻城該撫不肯出一軍抵禦坐待省城失陷城中男婦死者以數萬計覈其情節實屬一籌莫展貽誤生民所有羅遵殿卹典著卽撤銷至伊妻伊女同時殉難應得旌典仍著瑞昌王有齡查明照例辦理○諭李若珠奏天長六合賊匪撲犯瓜揚當經擊退等語四月初六日逆匪分三路來撲揚州一由陳家集圖竄揚城一由東溝圖竄瓜州一由僧道橋紮筏意欲偷渡邵伯經李若珠調上游總兵李德麟所部礮船派副將王萬清調遣初七日參將詹啟綸帶馬隊由三汊河進剿會同團練乘賊不備驟馬殺入賊眾奔逃十一日詹啟綸復由黃珏橋繞往僧道橋一帶鈔擊王萬清亦由邵伯湖帶隊上岸兜剿該逆遂於僧道橋修築土圍木城希圖久踞詹啟綸復由黃珏橋中路直擣賊巢副都統海全由楊獸場右

路進擊副將劉成元由陳家集左路分鈔該逆先出五六千人抗拒我師詹啟綸輕騎直前所向皆靡當將賊營兩座及木城同時焚毀海全等橫斜截擊直追至陳家集地方始行收隊共生擒長髮賊四百餘名分別正法辦理尙爲得手仍著設法進剿陳家集踞匪毋稍稽延○諭軍機大臣等前據袁甲三奏已派副將黃開榜等礮船由蔣壩三河往來巡防高郵寶應等湖杜賊竄渡茲據李若珠巴棟阿各奏探聞常州無錫江陰疊陷於賊蘇城危在旦夕等語金陵官軍挫退後再集再潰和春因傷殞命張國樑亦存亡未卜何桂清棄常州不守曾國藩尙未具奏啟程日期張玉良新署欽差關防一時未能驟振軍威江南大局甚爲棘手江北六合之賊竄逼揚州公道橋等處雖經李若珠擊退而賊勢甚張袁甲三見駐臨淮剿辦皖北賊匪與清淮密邇淮揚一旦告警著

卽設法撥兵救援以保大局將此由六百里諭令知之○諭本日據李若珠奏揚防喫重情形並請飭吳全美所帶艇船停泊狼福兩山等處又據巴棟阿奏常州江陰相繼失守各摺片逆匪自竄陷丹陽以後一由奔牛直趨常州一由丹陽竄丹徒逼近鎮城復沿江繞竄戴港諫壁圖山關各口岸以致南北文報不通鎮江爲南北咽喉前據巴棟阿奏官軍擊勦獲勝府城解圍當諭令李若珠勤加偵探如果逆匪再圖竄擾卽行派撥水師實力援勦見在賊勢猖獗難保不傾巢再撲惟江南無兵可調著巴棟阿會同馮子材向奎等協力守禦與李若珠聲勢聯絡以遏賊匪北竄之路李若珠駐紮揚州督辦江北軍務見在防勦喫緊之際責無旁貸況既有薛成良一軍八千餘名加以揚防兵勇數已逾萬卽著督率弁兵認真堵禦力遏賊氛以維東南大局所關吳全美艇船二

百餘號著准其調赴狼山福山等處擇要停泊毋令賊匪由江陰等處北來肆擾並以疏通餉道其李德麟師船仍畱江上梭巡以防江南竄匪嗣後蘇常賊勢稍鬆仍將吳全美艇船調回著李若珠相度情形妥爲籌辦將此由六百里加緊諭知李若珠巴棟阿並傳諭吳全美李德麟知之○山東巡撫文煜奏福山縣於本月十九日有自稱佛國兵船至煙臺山下約有三四千人各執器械上岸占住民房卽於山上紮營並張貼告示尙不滋鬧見選長於詞令之員妥爲開導奏入諭薛煥剴切開導悉心籌辦○以揚州剿賊出力開復福建陸路提督李若珠處分○癸巳諭軍機大臣等前有旨令曾國藩統領所部各軍取道甯國廣建一帶徑赴蘇州相機兜剿並令都興阿速赴江北督辦江北軍務本日據瑞昌等奏蘇州於四月十三日失守請飭催曾國藩剋日統師東下等

語見在江南遭此蹂躪糧餉無款可籌著官文胡林翼妥速將各軍應需餉糈寬爲籌備一面遴委妥員撥解曾國藩軍營一面卽籌款交都興阿帶赴江北此後並須源源接濟毋令缺乏以次攻克蘇常維持東南大局是爲至要將此由六百里諭令知之○諭本日據瑞昌奏蘇州失守請飭曾國藩來浙督辦等語江南軍務自和春身故大營兵勇全行潰散不獨不堪任使並且擾害民間非有勁旅不足埽蕩賊氛張芾派江長貴帶兵二千七百名蕭翰慶帶兵四千名周天受派劉仁福帶兵二千名毓科派文瑞劉芳貴帶兵三千八百餘名皆係赴援蘇常之軍據瑞昌等奏江蘇潰散兵勇紛紛南下已諭令該將軍等飭張玉良截留認真簡汰惟賊勢飄忽異常官兵能否抵禦尙未可定著曾國藩卽遵前旨兼程前進由浙赴蘇會同瑞昌調度各軍昨據張芾奏溧陽股匪復

陷建平進犯甯國此路如有梗阻務當設法繞道以免耽延將此
由六百里加緊諭令知之○諭本日據王有齡喬松年等奏蘇州
失守張玉良退至杭州江南全勢已成糜爛江北六合之賊竄擾
揚州僧道橋地方雖經李若珠奏稱擊退而賊勢正張江南逃潰
兵勇難民紛紛渡江又恐南岸逆匪乘此紛擾與六合天長之賊
合成一片辦理益難著手李若珠近患風痺聞已不能得力都興
阿曾經具奏啟程著速統帶馬步諸軍馳往揚州等處擇要扼紮
力籌堵剿務使天六之賊不得與江南賊勢聯合其江面水師斷
賊北渡尤爲緊要必須設法調度水陸互相策應毋致長江之險
盡失鎮江與揚州隔江聲勢相倚都興阿到江北後亦應聯絡一
氣探明蘇常確實情形相爲策應曾國藩見署兩江總督未知何
時始能趕到並須隨時偵探明悉具奏方能胸有全局通籌辦理

力固北路藩籬也將此由六百里加緊諭令知之○諭本日據瑞昌等先後馳奏蘇省被陷張玉良退回杭州請催調援師各摺江長貴一軍已由湖州至平望去蘇不過數十里王有齡何不催令赴蘇乃令在平望相機前進以致援兵不至蘇州失陷實屬誤事此時瑞昌已總統諸軍卽著飭令江長貴及蕭翰慶各軍星夜前進迅圖克復蘇州毋稍延誤江蘇潰散兵勇紛紛南下到杭者已有一二萬之眾著卽令張玉良認真簡汰挑選得力者統帶前行毋使流爲匪類杭州城守事宜卽著副都統來存會同王有齡督辦另撥兵於嘉興平望一帶扼要設防以保浙疆將此由六百里加緊諭知瑞昌王有齡並諭江長貴知之○諭前命曾國藩署理兩江總督尙未據奏啟程已降旨令薛煥暫署惟見在上海辦理夷務正當喫緊之際薛煥未可遽離而蘇常猝遭蹂躪其餘各屬

地方應如何籌防籌剿之處及收集兵勇籌備各路援兵糧餉軍火均屬萬分緊要著薛煥卽在上海地方悉心籌辦務飭各屬地方官聯絡紳民同心禦侮毋令該逆再陷完善之地將此由六百里加緊諭令知之○諭本日據喬松年奏蘇州危急並探聞蘇城失守各一摺見在京營勁旅萬難遠調已諭曾國藩等帶兵前進江北軍務緊要李若珠病體雖未就痊昨因僧道橋等處獲勝責令實力防剿荊州將軍都興阿統帶各軍計日亦可馳抵揚州並令王夢齡迅赴淮安撥軍來揚助剿是江北兵力足資堵禦該運使所奏水師艇船餉無從出已交戶部速議具奏矣遇賊北竄全恃江面水師不可聽其潰散喬松年當遵前旨先行設法支放水師兵餉毋得意存推諉○兩淮鹽運使喬松年奏大江南北賊勢愈熾而英人志在覬利尙非壹意構兵請暫主撫議得旨速就撫

局原屬正辦若藉資夷力後患無窮○先是安徽巡撫翁同書奏
皖北軍需協餉不濟請覈議籌撥以顧大局當交怡親王載垣等
會同軍機大臣戶部議奏至是奏稱該撫軍營餉需撥款每月不
下十餘萬兩除趕令山西陝西河南三省於月協二萬兩外按月
帶解一二萬兩仍限半年將欠款全數解清惟該營兵勇共有若
干安省地漕關稅捐輸抽釐每歲共有若干請飭令查明奏報至
恩錫摺內所陳一切情形止極言欠餉之弊不暇顧理之所安顯
係暗受屬使尤屬非是請將署按察使恩錫交部議處從之○以
兵勇潰退革署欽差大臣廣西提督張玉良職仍留營差遣命杭
州將軍瑞昌總統江南軍務署湖北提督江長貴幫同辦理○以
薛煥暫署兩江總督○命江西福建各督撫速籌餉銀解往浙江
以備要需○改江蘇靖江縣暫隸通州○是月蠲緩江西奉新等

三十二縣被災被兵地方新舊額賦